

摘藻堂四庫全書薈要

史部

欽定四庫全書薈要卷九千二百六十三

史部

通典卷四十五

唐 京兆杜佑君卿纂

禮五 吉四

方丘

神州后土附
後漢 魏 晉 後魏

顓頊 夏 殷 周 漢
東晉 宋 齊 梁 陳
後周 隋 大唐

王者父天母地故庖羲氏俯而觀法焉○顓頊乃命火

正黎司地以屬人

火當為北北陰位也正長也司主也
屬會也所以會聚羣神使各有序

○夏以五月祭地祇○殷以六月祭○周制大司樂云

夏日至禮地祇於澤中之方丘

地祇主昆侖也必於澤中者所謂因下以事地

其丘在國之北

就陰位

禮神之玉以黃琮

琮八方象地

牲用黃

犢幣用黃繒

大宗伯云黃琮禮地下文云皆有牲幣各放其器之色則牲幣皆宜以黃

王及

尸同服大裘

祭地之服無文崔靈恩賈公彥孔穎達皆云與祭天同服今按郊特牲云器用陶匏

以象天地之性是同器也

王制云天地之牛角繭栗是同牲也又鈞命決云地配以后稷又配祭同也此類頗

多凡覆載功齊煦育德

一尚質之義安有二哉配以后稷按鈞命決釋孝經云

祭天南郊就陽位祭地北郊就陰位

后稷為天地主文王為五帝宗是也其樂則大司樂云

后稷為天地主文王為五帝宗是也

其樂則大司樂云

凡樂函鍾為宮太簇為角姑洗為徵南呂為羽靈鼓靈鼗孫竹之管空桑之琴瑟咸池之舞夏日至於澤中之

方丘奏之若樂八變則地祇皆出可得而禮矣

先奏是樂以致

其神禮之以玉乃後合樂而祭焉函鍾林鍾也林鍾生於未之氣未坤之位也或曰天社在東井與鬼之外天社地神以之為宮用聲類求之凡祭天地宗廟之樂無商者尚柔商堅剛也靈鼗六面鼓也孫竹竹支根之未生者也空桑山名其神州地祇謂王者所卜居吉土五千里之

內地名也

先儒皆引禹受地統書云崑崙東南地方五千里名曰神州是也按皇地祇鄭玄以為崑

崙即是土地高著之稱既舉最高為稱是知四和之地皆及之至於神州但方五千里而已故不云丘而言郊

玉用兩珪五寸有邸

儻而同邸也所謂祠於北郊神州之神儻音昌絹反兩足相向之義

牲用黝犢

地官牧人云陰祀用黝牲注云謂祭地北郊

幣用黑繒

幣黑色無文按崑崙

牲幣用黑色則神不宜異也

其壇於北郊築土為壇名曰太折

祭法云瘞

埋於太折祭地也注云折照晰昭明之名尊神

配亦以后稷

鉤命決云郊祀后稷以配天地

其

樂奏太簇歌應鍾舞咸池以祭地祇

地祇所祭於北郊謂神州之神及社

稷備五齊

若神州則醴齊而下四齊

七獻

本擬大祫九獻以外神無裸故七獻

王及尸

服齋戒乘路酒樽薦菹醢之器藉神席橐拮蒲越及鷄

人呼晨司樂宿懸掌次設次大宗伯攝亞獻並如圓丘

其日王服大裘立於方丘東南西面乃奏函鍾為宮以

下之樂以致其神訖王又親牽牲取血并玉瘞之以求

神謂之二始

天地之祭惟圓丘方丘備此二始謂圓丘之先奏函鍾為宮之樂次燎牲及玉幣也

方丘則先奏函鍾為宮之樂次則瘞埋血及玉幣二者在正祭之前故云二始

尸前既置玉幣

等訖次則王以匏片為爵酌瓦甔之泛齊以獻尸位謂

之朝踐

所謂陶匏象天地之性

次大宗伯亦以匏爵酌醴齊攝王

后之獻凡二獻也次薦熟於神座前畢王更以匏爵酌

盞齊以獻尸大宗伯以匏爵酌醴齊以亞之所謂饋食之

獻凡四獻也尸乃食食訖王更酌朝踐之泛齊以醑尸
所謂朝獻大宗伯次酌饋食之醴齊以亞之所謂再獻
凡六獻也次諸臣為賓酌沈齊以獻尸凡七也王每獻
酒皆作樂一終○漢高帝定天下後詔御史置祠祀官
女巫漢初因秦滅學禮經在人間潛出所以祠祀未修
典禮用女巫者未多其梁巫主祠天地武帝即位曰朕
親郊而后土無祀則禮不答也於是東幸汾陰汾陰男
子公孫滂等見汾旁有光如絳遂立后土祠於汾陰

睢音雖上澤中為五壇

壇方五丈高六尺

壇一黃犢以高帝配牢

具已祠盡瘞而從祠者衣尚黃始用樂舞帝親遙拜如

上帝禮

從寬舒等議

至宣帝修武帝故事間歲正月至

河東祠后土成帝建始初徙河東后土於長安北郊

時丞

相匡衡奏言祭地於北郊即陰之象也故天之於天子也因其所都而各享焉今祀后土反東之少陽宜徙之

長安後以帝無繼嗣復汾陰后土如故帝崩皇太后詔復

北郊長安平帝立地與天合祭於南郊壇

時從王莽議事見郊天篇

○後漢光武中元二年營北郊祀地祇在雒陽城北四

里為方壇四陛遷呂太后於園上薄太后尊號曰高皇后以配地祇正月辛未別祀地祇位南面西上高皇后配西面北上皆在壇上地理羣神從食皆在壇下中岳位在未四岳各在其方孟辰之地中營內海在東河西濟北淮東河南山川各如其方皆在外營內四陛陟衛

反及中外營門封神如南郊地祇高后用犢各一五岳共牛一四海四瀆共牛一羣神共牛二樂如南郊既送神瘞俎實於壇北明帝永平二年正月上丁祀南郊畢

次郊○魏明帝景初元年詔祀方丘所祭曰皇后以舜

妃伊耆氏配北郊所祭以武宣皇后配

時高堂隆上表云古來娥英姜

姒盛德之妃未有配食於郊者也漢文初祭地祇於渭陽以高帝配孝武立后土於汾陰亦以高帝配唯王莽引周禮享先妣為配地郊夏至以高后配地自此始也臣謂宜依古典以武皇配天地也魚豢議曰宜以宣后配地蜀主劉備即位營北郊於成都○晉武帝受禪後泰始二年定郊祀

地郊先后配是年并圓方二丘於南北郊更修壇兆其

二至之祀合於二郊

時從有司議云古者郊丘不異

十一月庚寅帝親

祀於南郊自後方澤不別立○東晉元帝大興二年北

郊未立地祇共在天郊明帝太寧三年七月始詔立北郊未及建而帝崩成帝咸和八年於覆舟山南立地郊以宣穆張皇后配五岳四望四海四瀆五湖諸山江等凡四十四神及諸小山從祀

此依魏氏故事非晉舊也

康帝建元元

年正月辛巳祀北郊帝皆親奉牲用玄

時將北郊太常顧和表按後漢

光武正月辛未始建北郊此則與南郊同月於是從和議郊廟牲幣璧玉之色雖有成文秦代多以駢駒漢則但云犢未辨其色江

左南北同用玄牲

○宋武帝永初二年親祀南北郊

孝武帝大明三年移北郊於鍾山北原道西與南郊相

對後還舊處

初晉始置於覆舟山南至此移之廢帝以舊地吉祥復之

○齊高帝受

禪建元二年正月次辛祀北郊犧牲之色依舊不改

時從

王儉議

而無配武帝永明五年議郊祀用正月次辛瘞后

土御並親奉車服之儀率遵漢制出以法駕袞冕

用次辛之

義已注天郊

○梁武帝制北郊為壇於國之北

壇上方十丈下方十二丈

高一丈四面各一陛其為外壇再重

常與南郊間歲正月上辛祀后土於

壇上以德后配禮以黃琮五官先農五岳及國內山川

皆從祀地攢題曰后地座用上和香

以地與人親宜加雜馥

省除

四望座

博士明山賓議北郊有岳鎮海瀆之座而又有四望座疑為重遂省四望座也

松江浙

江五湖鍾山白石山並留之如故帝行一獻之禮

議在南郊

文

○陳武帝受禪亦以間歲正月上辛用特牛一祀於

北郊以皇妣昭后配及文帝天嘉中改以德皇帝配宣

帝即位以郊壇卑下更增廣之

祠部郎中王元規議舊壇上徑廣九丈三尺請

加七尺以則地義下徑廣十五丈取三分益一高丈五寸請加尺五寸取二倍漢家之數

○後魏道

武即帝位二年癸亥瘞地於北郊以神元實皇后配壇

兆制同南郊五岳名山在中壝內四瀆大川於外壝內

后土神元后共用玄牲一玉用兩珪有邸幣用束帛五

岳等共牛一祭畢瘞牲體於壇北亥地其後夏至祭地

於方澤用幣牲之屬與二郊同○北齊制三年一祭以

夏日至禘崑崙皇地祇於方澤以武德皇后配為壇在

國北郊壇廣輪四十尺高四尺面各一階其外為三壝相去廣狹同圓丘壝外大營廣輪三百二十步

餘如圓丘又為瘞坎於壇之禮以黃琮束帛神州社稷

壬地中壝之外廣深丈二尺天下山水並從祀用牲十二犧同圓丘○後周祭后土

地祇於國北郊六里為壇壇一成八方下崇一丈方六丈八尺上崇五尺方四尺方

各一陞每尺一級其墻八面徑百二十步內墻半之以神農配牲以其方之色神

州壇在其右以獻侯莫那配焉

壇崇一丈方四丈其壇如方丘莫那則周文帝

之遠祖自陰山南徙始居遼西

○隋因周制夏至祭皇地祇於宮城

北郊十四里為方壇

其丘再成成高五尺下成方十丈上成方五丈成則重也以太

祖武元配神州迎州冀州戎州拾州柱州宮州咸州揚

州其九州山林川澤丘陵墳衍原隰皆從祀

地祇及配帝在壇上

神州九州神座於壇第二等八陞之間神州東南方迎州南方冀州戎州西南方拾州西方柱州西北方宮州咸州東北方揚州東南方九州山海以下各以方面八陞之間唯冀州山林川澤丘陵墳衍於壇之南少西

地祇配帝等牲用黃犢二神州以下用方色犢一九州

山海墳衍等加羊豕各九孟冬祭神州於北郊亦以太

祖武元配牲用犢二凡大祀養牲在滌九旬昊天五帝日月星地

祇神州宗廟社稷中祀三旬星辰五祀四望小祀一旬司中司命風師雨師諸星山川

其牲方色難備者聽以純色代煬帝大業元年孟冬祭

神州改以高祖文帝配○大唐制夏日至祭皇地祇於

宮城之北郊十四里為方丘壇因隋制以景帝配神州

五方岳鎮海瀆山林川澤丘陵墳衍原隰皆從祀地祇配帝

在壇上神州在壇第二等五岳以下三十七座於壇下外遺之內丘陵等三十座於壇外地祇及配

帝牲用黃犢二神州黝犢一岳鎮以下加羊豕各五孟

冬祭神州於北郊

太常博士陸遵楷張羅師權無二許子儒等議稱北郊之月古無明文漢

光武正月辛未始建郊東晉成帝咸和中議北郊用正月皆無明據武德來禮令即用十月為是陰用事故於

此時祭之請依舊十月致祭

景帝配牲用黝犢二貞觀中奉高祖配

地郊永徽中廢神州之祀

禮部尚書許敬宗奏方丘祭地之外別有神州謂之地郊

地分為二既無典據又不通請合為一祀

乾封初又詔依舊祀神州

皇地祇壇依舊

於渭水北置

二年詔以高祖太武皇帝崇配方丘等祀

司禮少常

伯郝處俊等奏檢舊禮以代祖元皇配感帝兼配神州
顯慶禮廢感帝祀以高祖配昊天兼配神州議備郊天
篇太極元年正月初將有事於南郊有司議唯祭昊天

上帝續議請設皇地祇位

時諫議大夫賈曾上表論合設皇地祇位語具郊天篇

開元二十一年夏日至祀皇地祇於方丘以高祖配立

冬祭神州於北郊以太宗配其儀備開元禮

初中書令房玄齡與

禮官議以為依禮有益於人則祀之神州者國之所托
餘八州則義不相及近代通祭九州今除迎州等八座
唯祭皇地祇及神州以正祀典開元十一年玄宗自東都將還西京便

幸并州至十二年二月二十二日祠后土於汾陰睢上

太史奏榮光出河休氣四塞祥風繞壇日揚其光

舊祠堂為

婦人素像武太后時移河西梁山神素像就祠中配焉至十一年有司遷梁山神像於祠外之別室

二十

年車駕欲幸太原中書令蕭嵩上言云十一年親祠后

土為蒼生祈穀自是神明昭祐累年豐登有祈必報禮

之大者且漢武親祠睢上前後數四伏請准舊事至后

土行報賽之禮從之至十一月二十一日祀后土於睢

上其文曰恭惟坤元道昭品物廣大茂育暢於生成庶

憑休和惠及黎獻博厚之位粵在汾陰肅恭時巡用昭

舊典敬以琮幣犧牲粢盛庶品備茲瘞禮式展誠慤睿

宗皇帝配神作主禮畢令所司刊石祠所

上自為文

社稷

顓頊

高辛

唐

虞

夏

殷

周

漢

後漢

魏

晉

東晉

宋

齊

梁

陳

後魏

北齊

後周

隋

大

唐

顓頊祀共工氏子勾龍為社

祭法曰共工氏霸有九州其子曰后土能平水土故

祀以烈山氏子柱為稷

祭法曰烈山氏之有天下其高子曰柱能殖百穀故祀為稷

辛氏唐虞夏皆因之殷湯為旱遷柱而以周棄代之欲

遷勾龍無可繼者故止

先王之制法施於人則祀之

○周制天子立

三社祭法云王為羣姓立社曰大社羣衆也為百官及兆人所置立於

庫門內之西立之

小宗伯云左宗廟右社稷鄭玄曰庫門內雉門外也周代文尚尊尊在右

也案公羊魯桓公二年取部大鼎納於大廟何休云質家右宗廟尚親親文家右社稷尚尊尊是也王自

為立社曰王社於籍田立之

按詩周頌云春籍田而祈社稷既因籍田遂以祈社

則是籍田中立之王親籍田以供渠盛故因立社以祈之

所亡國之社曰亳社廟門

之外立之

春秋哀公四年亳社災穀梁傳云以滅國之社為廟屏

諸侯立三社祭

法云諸侯為百姓立社曰國社

亦為百官下及萬人所置於皐門之

西立之

按諸侯三門外曰皐次曰應內曰路

自為立社曰侯社亦於籍田

中立之

按祭義諸侯亦有籍田故

亳社

立處蓋與天子同按春秋云亳社殷社諸侯

有之所以

大夫以下立一社祭法云大夫以下成羣立

社曰置社

大夫不得特立社與族人合居百家以上則共立一社今時里社是也郊特牲曰惟為社

事單但立名雖異其神則同皆以勾龍配之稷周棄配

之據先儒所說不同王肅之徒即云但祭勾龍后稷人神而已非為配祭與鄭更相折難別有評議不復具

論按兩家所釋鄭義社者五土之神五土謂若地官司為長故今據以為說社者五土之神徒職云山林川澤

丘陵墳衍原隰等各有所育羣生賴之故於土生物處別立其名為社援神契云社者土地之神能生五穀郊

特牲云社所稷者於五土之中特指原隰之祗以五土以神地之道

所生而山林川澤丘陵墳衍此四者雜出材用等物於五穀之功則少且生人所急者食故於五土之中別旌異原隰之祇以報之以其能生五穀名其神但五穀不可適言以稷為五穀之長春生秋成最得中和之氣故取以名其神表言其處能生稷也非謂止祭其穀粒故援神契云社者土地之主稷者原隰之中能生五穀之祇是也又禮記曰家主中雷而社壇在東稷壇在西俱國主社稷以其俱是土神也

北面壇築牆開四面門

且社稷陰神皆以北面為尊地道長右故稷在西也知北面及

有牆者郊特牲說社云君南向於北墉下答陰之義是也

天子之社則以五色土各

依方色為壇廣五丈

春秋大義曰天子社壇博五丈諸侯半之天子大社東方青南方赤

西方白北方黑冒以黃土

諸侯則但用當方之色為壇皆立樹以表

其處又別為主以象其神

禮記大傳說牧野之事云既

書甘誓云不用命戮於社則天子諸侯軍行皆載社主也其主鄭注但云蓋用石為之以石為土類故也

夫以下但各以地所宜之木而立之

司徒職云設其社稷之壇而樹之田

主各以其野所宜之木遂以名其社禮神之玉蓋用兩珪有邸

典瑞云兩珪有邸以

祀四望崔靈恩云社稷同四望其玉蓋同也以珪銳首象土生物

其牲王制云天子祭

社稷皆太牢諸侯祭社稷皆少牢皆黝色

地官牧人云陰祀用黝牲

鄭注云陰祀謂祭地北郊及社稷也

用黑幣

按牲幣同色

日

用甲

郊特牲云日用甲日之始也按周初未制禮祭日之時日猶用戊故召誥云戊午乃社於新邑

祭日

之晨王及尸皆服絺冕

司服云祭社稷五祀則絺冕知有尸者鳧鷖詩所謂公尸樂

則大司樂云奏太族歌應鍾舞咸池以祭地祇

太族陽聲第二

者應鍾為之合地祇謂神州社稷也

用三獻

禮器云三獻文鄭注謂祭社稷五祀也

其禮取

血先瘞於所祭之處以為祭始

大宗伯云以血祭祭社稷

次則禮神

以玉時尸前薦燔肉及脯醢籩豆

郊特牲云三獻燔

王則酌大

罍中酒以獻尸

大罍瓦罍

所謂朝踐之獻是為一獻也至薦

熟時宗伯亦攝后酌以亞獻所謂再獻

每獻酒奏太族等樂一終尸

食訖賓長酌醑尸謂之三獻天子太社必受霜露風雨

以達天地之氣故喪國之社屋之不受天陽也亳社北

牖使陰明也

絕其陽通其陰而已亳殷之社殷都亳也白虎通云王者諸侯必有柴社者何示有

存亡也明為善者得之為惡者失之春秋公羊傳云亡國之社掩其上柴其下

亳社有所祈求

禱祠則祭之以刑官為之尸喪祝掌其禮

秋官士師職曰若祭勝國

之社則為之尸鄭玄注刑官為尸略之也春官喪祝職云掌勝國邑之社稷祝號以祭祀禱祠焉

○說

曰王者諸侯所以立社稷者為萬人求福報功也人非

土不立非穀不生不可偏敬故立社稷而祭焉自經籍

灰燼互執不同鄭玄注社稷者土穀之神勾龍后稷以

配食也按所據郊特牲云社祭土而主陰氣君南嚮於北墉下答陰之義又云社者神地之道又周禮以血祭祭社稷五祀五岳樂用靈鼓大喪三年不祭唯天地社稷越紼而行事王肅云勾龍周棄並為五官故祀為社稷按所據左氏傳云勾龍為后土祀以為社故曰伐鼓於社責上公也今俗猶言社公上公之義耳又牲用大牢與地不同若稷是穀神祭之用稷反自食乎崔靈恩云二家之說雖各有通途但昔來所習謂鄭為長故依

鄭義試評曰按崔靈恩以鄭為長稱當矣何者按公者尊稱以人尊社故曰社公王肅以俗言社公及以社為上公者俗言天公雷公豈上公乎又日蝕伐鼓於社責陰助陽之義也夫陽為君陰為臣日蝕者陰蝕陽也君弱臣強是以伐鼓於社云責上公耳若勾龍周棄為社則不得先五岳而埋血也以人鬼雖用血而不埋復云以無配食字是正神者周人禘饗而郊稷祖文王而宗武王亦無配食之說豈得不謂郊天者乎且人鬼之道

不用靈鼓不得越紼而祭也稷者土有生長之功立其
神因以稷名之鄭據孝經說曰社者土地之神稷者能
生五穀之神孝經援神契云稷乃原隰之中能生五穀
之祇今按本無正神人感其功欲美報之因以稷名所
以稷名神者五穀之長故也○漢高帝初起禱豐枌榆

社枌白榆社在豐東北十五里
或曰枌榆鄉名高帝里社

二年東擊項籍還入關

因命縣為公社後四年天下定詔御史令豐謹理枌榆
社其後又令縣常以春三月及臘祠后稷以羊彘人里

各自裁以祠隨豐也平帝時王莽奏帝王建立社稷百王

不易漢興禮儀稍定已有官社以后稷配食官稷高帝除秦

社稷立漢社稷禮所謂大社也時又立官社配以夏禹而未立官稷至此始立之稷種穀樹楮

也其子類穀徐州牧歲貢五色土一斛○後漢光武建武二

年立太社稷於洛陽在宗廟之右周禮曰社稷在右宗廟在左皆方

壇蔡邕獨斷曰天子大社封諸侯者皆取土苞白茅授之以立社於其國故謂之授茅土漢惟有皇子封為

王者得茅土其他功臣以戶數租入為節不受茅土立社無屋有牆門而已必受霜露風雨

二月八月及臘一歲三祠皆太牢具使有司祠漢儀使者監祠

南向立 郡縣皆置太守令長侍祠牲用羊豕唯州所理

有社無稷以其使官也○魏自漢後但太社有稷官社

無稷故常二社一稷也至明帝景初中立帝社

博士孔晁謂漢

氏及魏初皆立一社一稷至景初之時更立太社太稷

又特立帝社云禮記祭法云王為羣姓立社曰大社言

為羣姓下及士庶皆使立社非自立今並立二社二神

二位同時俱祭於事為重於禮為黷宜省除一社以從

舊典劉喜難曰祭法為羣姓立社若如晁議當言王使

不得言為下云王為羣姓立七祀諸侯自立為五祀若

是使羣姓私立何得踰於諸侯而祭七祀乎却為羣姓

立七祀乃王之祀也夫人取法於天取財於地普天率

土無不奉祀而何言乎明帝祭社但稱皇帝

王肅議太尉等祭祀

一神二位以為煩黷耶

但稱名不稱臣每有事須告皆遣祝史

○晉武帝太康九年詔曰社實一

神其并社之祀

車騎司馬傅咸表曰祭法王社太社各有其義穀梁傳曰天子親耕故自立社

為籍而報也國以人為本人以穀為本為百姓立社而祈報焉事異體殊此社之所以有二武帝引景侯王肅之論曰王社亦謂春祈籍田秋而報之也其論大社則曰王者布下圻內為百姓立之謂之大社不自立之於京師也景侯此論據祭法大夫以下成羣立社曰置社景侯解曰今之里社是太社天子為人而祀故稱天子社郊特牲曰天子太社必受霜露風雨夫以羣姓之衆王者通為立社故稱太社若夫里社其數不一蓋以里所為名左氏傳盟於清丘之社是也人間之社不稱太矣若復不立之京都當安所立乎前被勅尚書召誥云社於新邑唯一太牢不立二社之明義也郊特牲曰社稷太牢必據一牢之文以明社之無二則稷無牲矣說

者則曰舉社則稷可知苟可舉社以明稷何獨不舉一
以明二國之大事在祀與戎若有過而除之不若過而
存之存之有義除之無據周禮封人掌設社壇無稷字
今帝社無稷蓋出於此然國主社稷周禮王祭社稷則
絺冕此王社有稷之文也封人設社壇無稷字說者以
為約文從可知也謂宜仍舊立二社而加立帝社之稷
禹貢惟土五色景侯解曰王者取五色土為大社封四
方諸侯各割其方色土者覆四方也如此大社復為立
京都也詔曰社實一神而相襲二位衆議不同何必改作其便仍舊一如魏制○東晉元帝建

武元年又依洛京立二社一稷○宋仍晉舊無所改作
○齊武帝永明十一年何佟之議其神一位北向稷東
向齋官社壇東北南向立以西為上諸執事西向立以

南為上稷名太稷

兼社祠部郎中何佟之議按禮記郊特牲社祭土而主陰氣也君南向於北

墉下答陰也王肅云陰氣北向故君南向以答之為言

是相對之稱知古祭社北向設位齋官南向明矣近代

相承帝社南向太社及稷並東向而齋官在帝壇北西

向於神背後行禮又名稷為稷社甚非禮意謂二社語

其義則殊論其神則一位並宜北向稷若北向則成相

背稷是百穀之總神非陰陽之主宜依先東向齋官在

社壇東北南向立以西為上諸執事西向立以南為上

稷依禮無兼稱若欲尊崇正可名太稷豈得稷社耶治

禮學士議曰郊特牲云君南向答陽也臣北向答君也

若以陽氣在南則立應北向陰氣向北則立宜向南今

二郊一限南向皇帝奠幣東西向故知壇墀無係於陰

陽設位寧拘於南北羣神小祠類皆向南面薦饗之時

北向行禮蓋欲申靈祇之尊表求幽之理議與佟之相

難凡三往反有司議治禮無的然明據佟之議乃行也

○梁社稷在太廟西天監四年以太常省牲太常丞牽

牲太祝令贊牲

其初蓋晉元帝建武元年所初有太社帝社太稷凡三壇門牆並隨其方色每

以仲春仲秋并令郡國縣祠社稷先農及臘又各祠社稷於壇百姓則二十五家為一社其舊社及人稀者不

限其家春秋祠水旱禱祈祠具通其豐約舊太社廩犧吏牽牲司農省牲大祝史贊牲天監中明山賓議郊特

牲云社者神地之道國主社稷實為重今公卿貴臣親執盛禮而令微吏牽牲頗為輕末且司農省牲又非其

義太常禮官實當斯職禮祭社稷無親牽牲之文謂宜以太常省牲廩犧令牽牲太祝令贊牲帝唯以太祝贊

牲為疑又以司農省牲於理似傷廩犧吏執紃即至大事誠卑議以太常丞牽牲餘依山賓議於是遂定

同初又加官稷并前為五壇○陳依梁而帝社以三牲

首餘以骨體薦粱盛為六飯粳以敦稻以牟黃粱以簋
白粱以簋黍以瑚粱以璉

其儀本之齊制敦音對

○後魏天興二

年置太社太稷帝社於宗廟之右為方壇四陛以二月
八月日用戊皆太牢勾龍配社周棄配稷皆有司侍祠
○北齊立太社帝社太稷三壇於國右每仲春仲秋元
辰及臘各以一太牢祭焉皇帝親祠祭則司農卿省牲
進熟司空亞獻司農終獻○後周立社稷於左帝親祠
則冢宰亞獻宗伯終獻○隋文帝開皇初建社稷並立

於含光門之右仲春秋吉戊各以一太牢祭牲色用
黑孟冬下亥又臘祭之郡縣二仲月並以少牢各祭百
姓亦各為社○大唐社稷亦於含光門內之右仲春仲
秋二時戊日祭太社太稷社以勾龍配稷以后稷配武
太后天授三年九月為社至長安四年三月制社依舊
用八月神龍元年改先農壇為帝社壇於太壇西立帝
社壇禮同太社太稷其壇不備方色異於太社

時祝欽
明與禮

官等奏經典並無先農之文永徽年中猶名籍田垂拱
以後改為先農然先農與社本是一神其先農壇請改


為帝社以應王社之義其祭先農改為帝社仍請准令用孟春吉亥祀后土以勾龍配制從之又其年

五月詔於東都建置太社令禮官議立社太常少卿韋叔夏等引呂氏春秋及鄭玄議以為社主用石又按後魏天平四年四月太社石主遷於社宮是社主用石矣又檢舊社主長一尺六寸方一尺七寸禮官博士議社主制度長短在禮無文按韓詩外傳云天子太社方五丈諸侯半之蓋以五是土數故壇方五丈其社主請准五數長五尺淮陰之二數方二尺剡其上以象物生方其

下以象地體埋其半以根在土中而本末均也則神道設教法象有憑其尺請用古尺又檢舊社稷壇上四方布以方色唯中央數尺飾以黃土禮官韋叔夏等又議曰韓詩外傳云天子太社廣五丈各分置四方色訖上冒以黃土說者云冒以黃土象王者覆被四方據此合用黃土遍覆壇上今檢舊壇之上亦備方色唯中央數尺飾以黃土則是覆被之道有所不及既乖舊制請准古改造於是以方色飾壇之四面及四陛其上則以黃

土覆之天寶三載二月詔社稷列為中祀頗紊大猷自
今以後社稷升為大祀大歷六年十一月勅中祀並用
少牢至貞元五年九月國子祭
酒色佞奏請社稷復依
正禮用太牢詔從之

通典卷四十五



總校官庶吉士 臣侍 朝

校對官編修 臣楊壽楠

謄錄監生 臣喻秦階

欽定四庫全書叢要

史部

通典卷四十六

七

詳校官員外郎臣楊世綸



欽定四庫全書薈要卷九千一百六十四

史部

通典卷四十六

唐京兆杜佑君卿纂

禮六吉五

山川

黃帝

虞

周

秦

漢

後漢

魏

宋

黃帝祭於山川與爲多焉

山川與比也吉祭祀

○虞氏秩

於山川徧於羣神

秩序也以次序而祭之五

○周制四

坎壇祭四方

四方即謂山林川谷丘陵之神祭山林丘

以血祭祭五岳

陰祀自血起貴氣臭

以埋沈祭山林川澤

祭山林曰埋川

澤曰沈各順其性之含藏

一歲凡四祭一者謂迎氣時二者郊天時

三者大雩時四者大蜡時皆因以祭之禮神之玉兩珪

有邸五寸牲用少牢各隨方色幣亦隨牲色

牧人云望祀各以其

方之色牲毛之注云望祀謂五岳四鎮四瀆

器用蜃

鬯人云凡四方山川用蜃

用五獻

禮器

云五獻祭注云謂祭四望山川

祭日王及尸皆服毳冕

司服注云毳冕畫虎雖謂宗彛

其衣三章裳二章凡五也史記云周公祀太山以召公爲尸是有尸也

樂奏姑洗歌南呂

舞大韶以祀四望

姑洗陽聲第三者南呂爲合四望五岳四鎮四瀆

奏蕤賓歌

函鍾舞大夏以祀山川

徒賓陽聲次四

其祭之岳鎮則升血爲

始四瀆則沈血爲始

觀禮云祭山升祭川曰浮沈也爾雅云祭山曰度懸祭川曰浮沈也

度音久

次薦豆籩及爛肉爲朝踐

故大祭用腥則次祀用爛也爛謂沈肉於

委反

湯也故鄭云沈肉曰爛

時王酌盞齊以獻所謂朝踐之獻也大宗

伯亞獻亦以盞齊至熟王酌清酒以獻尸亞者亦清酒

所謂饋食之獻通前四獻也尸食訖王又酌清酒以酌

尸凡五獻也○秦并天下令祠官所常奉名山川鬼神

可得而序於是自嶠以東名山大川祠

嶠即今之陝郡二嶠曰太

室

太室嵩高也

恒山泰山會稽湘山水曰濟曰淮春以脯酒

爲歲禱因泮凍

解凍也

秋涸凍

涸讀與涸同音涸凝也春解秋凝

冬塞

先代

反禱祠

謂報其所祈下禱塞同

其牲用牛犢各一牢具圭幣各異

自華以西名山七曰華山薄山

薄山襄山也說者云在河東一曰在潼關北十

餘里而此云自華以西者今則閩鄉之南山連延西出並得華山之名

嶽山岐山吳山鴻

冢瀆山蜀之崐山也

周禮職方氏雍州其山曰嶽爾雅云河西曰嶽說者咸云嶽即吳嶽

也今此有嶽山又有吳山則吳嶽非一山但未詳嶽之所在徐廣云嶽山在武功地理志武功無嶽但有垂山岐山在今之岐山縣其山兩岐故俗呼爲箭括嶺吳山在今沂陽郡之吳山縣鴻冢者黃帝臣鬼臾區號大鴻

葬雍故鴻冢是也蘓林曰今雍有鴻冢崕在隴氐道也

名川四曰河祠臨晉

即今之馮

翊郡朝邑縣界沔祠漢中

沔漢水之上名也漢中今漢中郡也

湫泉祠朝那

湫泉在安

定郡界清徹可愛不容穢濁或有誼沔輒興雲雨土俗亢旱每於此求之相傳云龍所居也天下山川隈曲亦

往往有之江水祠蜀亦春秋泮涸禱賽如東方山川而牲亦

牛犢牢具圭幣各異而四大冢鴻岐吳嶽皆有嘗禾

新以

穀其河加有嘗醪皆在雍州之域近天子都故加車一

乘駟駒四灞澹澧滂涇渭長水皆在大山川數以近咸

陽盡得比山川祠而無諸加

謂加車及駟駒之屬

○漢孝文十二

年五穀不登詔增修山川羣祀

詔曰比年五穀不登欲增諸神祀按王制曰山

川神祇有不舉者爲不敬今恐山川百神因典禮者尚未盡秩其議增修羣祀宜享祀者以祈豐年

武帝

因巡狩禮其名山大川用駒者悉以木偶馬代行遇親

祠者乃用駒○後漢章帝元和二年詔祀山川百神應

禮者○魏文帝黃初三年禮五岳四瀆咸秩羣祀瘞沈

珪璋○宋武帝大明七年六月有司奏奠祭霍山殿中

郎五景先議宜使太常持節牲以太牢之具羞用酒脯

時穀禮以赤璋纁幣器用陶匏藉用茅爲壇北時不用

蜃同郊祀以爵獻凡肴饌種數依社祭○梁令郡國有
五岳置宰祀三人及有四瀆若海應祀者皆孟春仲冬
祀之○後魏景穆帝立五岳四瀆廟於桑乾水之陰春
秋遣有司祭其山川諸神三百二十四所每歲十月遣
祠官詣州鎮徧祀有水旱災厲則牧守各隨界內而祈
謁王畿內諸山川有水旱則禱之太武帝南征造恒山
祀太牢浮河濟祀以少牢過岱宗祀以太牢遂臨江登
瓜步而還○後周大將出征遣太祝以羊一祭所過名

山大川○隋制祀四鎮東鎮沂山西鎮吳山南鎮會稽

山北鎮醫無閭山

在東夷中遙祀

冀州鎮霍山並就山立祠祀

四海東海於會稽縣界南海於南海鎮南並近海立祠

及四瀆並取側近巫一人主知灑掃並令多植松栢○

大唐武德貞觀之制五岳四鎮四海四瀆年別一祭各

以五郊迎氣日祭之東岳岱山祭於兗州東鎮沂山祭

於沂州東海於萊州東瀆大淮於唐州南岳衡山於衡

州南鎮會稽山於越州南海於廣州南瀆大江於益州

中岳嵩山於洛州西岳華山於華州西鎮吳山於隴州
西海西瀆大河於同州北岳恒山於定州北鎮醫無閭
山於營州北海及北瀆大濟於洛州其牲皆用太牢祀
官以當界都督刺史充先天二年封華岳神爲金天王
開元十三年封泰山神爲天齊王天寶五載封中岳神
爲中天王南岳神爲司天王北岳神爲安天王六載河
瀆封爲靈源公濟瀆封爲清泉公江瀆封爲廣源公淮
瀆封爲長源公會稽山爲永興公岳山爲成德公霍山

爲應聖公醫巫閭山爲廣寧公八載閏六月封太白山
爲神應公其九州鎮山除入諸岳外並宣封公十載正
月以東海爲廣德王南海爲廣利王西海爲廣潤王北
海爲廣澤王分命卿監諸岳瀆及山取三月十七日一

時備禮兼冊祭儀具開元禮

武德二年十月上親祀華岳舊儀岳瀆以上祝版御

署訖北面再拜武太后證聖元年十月有司上言曰謹按五岳視三公四瀆視諸侯天子無拜公侯之禮請依舊議五岳以下署而不拜制可之開元元年太常奏伏准唐禮祭五岳四瀆皆稱嗣天子祝版皆進署切以舜典五岳視三公四瀆視諸侯則不合稱嗣天子及親署其祝文伏請稱皇帝謹遣某乙敬祭於某岳瀆之神從

之貞元四年五月太常卿苗晉奏五岳四瀆其神版並合御署至上元元年中祠小祠一切權停自後因循不請御署其祝版欲至饗祭日所司准程先取署附驛發遣勅旨宜依仍委所司每至時先奏附中使送初開元九年十二月天台道士司馬承禎言今五岳神祠是山林之神也非正真之神也五岳皆有洞府有上清真人降任其職山川風雨陰陽氣序是所理焉冠冕服章佐從神仙皆有名數請別立齋祠之所上奇其說因勅五岳各置真君祠一所

籍田

周梁

漢後魏

後漢

北齊

魏隋

晉

東晉

宋

齊

齊

齊

齊

齊

齊

周制天子孟春之月乃擇元辰親載耒耜置之車右帥

公卿諸侯大夫躬耕籍田千畝於南郊

籍借也謂借人力以理之倡率

天下使務農田春秋傳曰郊而後耕遂籍人力以成歲功故謂之帝籍天子田千畝於南郊諸侯百畝謂借於

東冕而朱紘躬秉耒天子三推推發也諸侯三公冕而青紘躬秉耒三公五推

諸侯九推以事天地山川社稷先古先古以爲醴酪粢盛於

是乎取之敬之至也內宰詔后帥六宮之人生種稭之種以

獻於王使後宮藏種而又生之太常條穀種黍稷種稭使內宰後宮生之者示

衆類孳息之祥且佐王於耕事所以俱自盡於郊廟也稭稭早也種晚也先種後熟謂之種後種先熟謂之稭

甸師掌帥其屬而耕耨王籍以時入之其屬庶人也耨鋤也王籍謂王

者籍田千畝所親帥公卿以下親耕之處也庶人終於千畝故曰帥其屬耕耨王籍入其收也○漢文

帝制曰農天下之本遂開籍田朕躬耕以給宗廟粢盛

粢黍稷也盛器謂簋簠

舊儀春始親耕於籍田官祀先農以一太

牢百官皆從

先農神農也五經要義云立壇於田所祠之其制度如社之壇

賜三輔二

百里孝悌力田三老種百穀萬斛爲立籍田倉置令丞

穀皆以給天地宗廟羣望之祀以爲粢盛景帝詔曰朕

親耕爲天下先昭帝幼即位耕於鉤盾弄田

鉤盾宦者近署故往

試耕爲戲弄

○後漢明帝永平中二月東巡耕於下邳章帝

元和中正月北巡耕於懷縣其籍田儀正月始耕常以

乙日祠先農及耕於乙地晝漏上水初納執事告祠先

農已享

耕日以太牢祭先農於田所

耕時有司請行事就耕位天子

三公九卿諸侯百官以次耕推數如周法力田種各耰

訖有司告事畢是月命郡國守皆勸人始耕○魏氏天

子親耕籍田藩鎮闕諸侯百畝之禮○晉武帝太始四

年正月丁亥帝躬耕籍田於東郊詔曰近代以來耕籍

田於數步之中空有慕古之名曾無供祀訓農之實而

有百官車徒之費今循千畝之制當與羣公卿士躬稼穡

之艱難以帥先天下於東郊之南洛水之北

去宮八里遠十六里

爲北

千畝帝御木輅以耕太牢祀先農自惠帝後禮廢矣○

東晉元年將修耕籍事竟不行

時朝議至尊應躬祀先農不賀循曰漢儀無躬

祭之文然王祭四望則毳冕祭社稷五兆則絺冕以此不爲無親祭之義

○宋文帝元嘉二

十一年將親耕

時史學生山謙之以科鳩集其儀因自奏聞詔言酌斟衆條造定圖注

先

立春九日司空大司農京尹令尉度宮之辰地八里之

外整制千畝中開阡陌立先農於中阡西陌南御耕壇

於中阡東陌北將耕宿青幕於耕壇之上皇后帥六宮

之人出種稊之種付籍田令耕日太祝令以一太牢祠
先農一如帝社儀孟春上辛後吉亥御乘耕根三蓋車
駕蒼駟建青旂著通天冠蒼幘青袞佩蒼玉藩王以下
至六百石皆衣青唯三臺武衛不耕不改章服駕出如
郊廟儀至籍田侍中跪奏至尊降車臨壇大司農跪奏
先農已享請皇帝親耕太史贊曰皇帝三推三反於是
羣臣以次耕王公及諸侯五推五反孤卿大夫七推七
反士九推九反籍令率其屬耕竟畝洒種即耰禮畢乃

班下州縣悉備其禮焉○齊武帝永平中耕籍田用丁

亥

時有司奏正月丁亥可祀先農比來並用立春後亥王儉以爲亥日籍田經記無文助教周山文議曰蔡

邕月令章句解元辰云甲幹也辰支也有事於天用甲有事於地用辰何佟之云少牢饋食禮云孝孫某來日

丁亥用薦歲事於皇祖鄭以爲不必丁亥今但直舉一日以言之耳禘太廟禮日用丁亥若不得丁則用己亥

辛亥苟有亥焉可也漢文用此日耕籍祠先農後王相承用之非有別義班固序亥位云陰氣應無射該藏萬

物而雜陽闕種也且亥既水辰含育有生播厥取吉其在茲乎使御史乘馬車載耒耜

從五輅後○梁初依宋齊禮以正月用事不齋不祭天

監十二年以啓蟄而耕

時在二月內尚書云以殷仲春籍田理在建卯於是改用二月

與百官御事並齋三日沐浴裸饗侍中奉耒耜載於象

輅以隨木輅之後

禮云親載耒耜措於參保介之御間則置所乘輅上

普通二年

又移籍田於建康北岸築兆域如南北郊別有親耕臺

在壇東帝親耕畢登此臺以觀公卿之推反○後魏太

武帝天興三年春始躬耕籍田祭先農用羊一○北齊

籍於帝城東南千畝內種赤梁白穀大豆赤黍小豆黑

稂麻子大麥小麥色別一頃自餘一頃地中通阡陌作

祠壇於陌南阡西廣輪三十尺四陛三壝四門又爲大

營於外設御壇於阡東陌北每歲正月上辛後吉亥祠

先農神農氏於壇上無配饗祭訖親耕○隋制於國南

十四里啓夏門外置地千畝爲壇行禮播殖九穀納於

神倉以擬粢盛穰藁以餉犧牲○大唐貞觀三年正月

二十一日太宗親祭先農籍於千畝之甸

初議籍田方面所在給事

中孔穎達曰禮天子籍田於南郊諸侯於東郊晉武帝猶於東南今於城東不合古禮太宗曰禮緣人情亦何常之有且虞書云平秩東作已在東矣又乘青輅推黛耜者所以順於春氣且朕見在少陽之地田於東郊蓋其宜也於是遂定武后改籍田爲先農壇神龍初復改先農壇

爲帝社稷

祝欽明

奏曰按祭法王自爲立社曰王社先

籍田而祈社稷是

也具社稷篇中 開元二十三年二月親祀神農於東

郊勾芒配禮畢躬御耒耜籍於千畝之甸時有司進儀

注天子三推公卿九推庶人終畝玄宗欲重勸耕籍遂

進耕五十餘步盡壠乃止耕畢輦還齋宮大赦侍耕執

牛官皆加級賜帛其儀備開元禮

先蠶

周

漢

後漢

魏

晉

宋

北齊

後

周制仲春天宮內宰詔后帥內外命婦始蠶於北郊以

爲祭服

蠶於北郊婦人以純陰也

天子諸侯必有公桑蠶室近川而

爲之築宮仞有三尺棘牆而外閉之后妃齋戒享先蠶

而躬桑以勸蠶事

季春吉巳王后享先蠶先蠶天駟也享先蠶而後躬桑示率先天下也

及大昕之朝君皮弁素積卜三宮之夫人世婦之吉者

使入於室奉種浴於川桑於公桑風戾以食之是月也

命有司無伐桑柘

愛蠶食也有司主山林之官也

禁原蠶

原再也天文辰爲馬蠶與

馬同氣物莫能兩大禁原蠶爲傷馬

○漢皇后蠶於東郊

其儀春桑生皇后親桑於苑中

蠶室養蠶千薄以上祀以中牢羊豕祭蠶神曰苑窳婦人寓氏公主凡二神羣臣妾從桑還獻於繭館皆賜從

桑者絲皇后自行窳音俞

○後漢皇后四月帥公卿列侯夫人蠶皇

后出乘鸞輅青羽蓋駕四馬龍旂九旂大將軍妻參乘

太僕妻御前鸞旂車皮軒闕

音翕

戰雒陽令奉引千乘萬

騎車府令設鹵簿駕公卿五營校尉司隸校尉河南尹

妻皆乘其官車帶夫本官綬從其官屬導從皇后置武

賁羽林騎戎頭黃門鼓吹五帝車女騎夾轂執法御史

在前後亦有金鉦黃鉞五將導桑於蠶宮手三盆於繭

館畢還宮祀先蠶禮以少牢

凡蠶絲絮織飾以作祭服祭服者冕服也天地宗廟

羣神五時之服其皇帝得以作縷縫衣得以作巾絮而
已置蠶宮令丞諸天下官皆詣蠶室亦婦人從事故舊
有東西織室作法○魏文帝黃初七年皇后蠶於北郊依周典

也○晉武帝太康六年蠶於西郊蓋與籍田對其方也先蠶壇高

一丈方二丈四出陛陛廣五尺在皇后採桑壇東南帷

宮外門之外而東南去帷宮十丈在蠶室西南桑林在

其東取列侯妻六人爲蠶母蠶將生擇吉日皇后著十

二筭步搖依漢魏故事衣青衣乘油畫雲母安車駕六

駟音貴馬女尚書著貂蟬佩璽陪乘載筐鉤公主夫人九

嬪世婦諸太妃太夫人及縣鄉君郡公侯持進夫人外
世婦命婦皆步搖衣青各載筐鉤從蠶先桑二日蠶宮
生蠶著簿上躬桑日皇后未到太祝令質明以太牢告
祠謁者一人監祠祠畢徹饌頒餘胙於從桑及奉祠者
皇后至西郊升壇公主以下陪列壇東皇后東面躬桑
採三條諸妃公主各採五條鄉縣以下各採九條悉以
桑授蠶母還蠶室事訖皇后還便即御座公主以下乃
就位設饗宴賜絹各有差○宋孝武大明四年始於臺

城西白石里爲蠶所設北域置大殿又立蠶觀

其禮皆循晉氏

○北齊爲蠶坊於京城北之西去皇宮十八里外有蠶宮方九十步牆高一丈五尺其中起蠶室二十七別殿一區置蠶宮令丞宦者爲之路西置皇后蠶壇高四尺方二丈四陞陞各廣八尺置先蠶壇於桑壇東南大路東橫路南壇高五尺方二丈四陞陞各五尺外北方四十步面開一門有緣襜褕禼衣黃履以供蠶母每歲季春穀雨後吉日使公卿以一太牢祠先蠶黃帝軒轅氏

於壇上無配如祀先農禮訖皇后因親桑於壇備法駕服鞠衣乘重翟帥六宮升桑壇東陛即御座女尚書執筐女尚衣執鉤立壇下皇后降自東陛執筐者處左執鉤者居右蠶母在後乃躬桑三條訖升壇即御座內命婦以次就桑服鞠衣者採五條展衣祿衣者九條以授蠶母還蠶室切之授世婦洒一簿凡應桑者並復本位后乃降壇還便殿設勞酒頒賚而還○後周制皇后乘翠輅率六宮三妃三嫔音弋婦官名御媛御婉三公夫人三

孤內子至蠶所以一少牢親進祭奠先蠶西陵氏神禮
畢降壇令二嬪爲亞獻終獻因而躬桑○隋制先蠶壇
於宮北三里爲壇高四尺季春上巳皇后服鞠衣以一
太牢制幣祭先蠶於壇上用一獻之禮祭訖親桑於位
壇東面尚功進金鉤典制奉筐皇后採三條反鉤命婦
各依班採五條九條止世婦於蠶母受切桑洒訖皇后
乃還

自齊及周隋其典法多
依晉儀亦時有損益

○大唐顯慶元年三月辛

巳皇后武氏先天二年三月辛卯皇后王氏乾元二年

三月己巳皇后張氏並有事於先蠶其儀備開元禮

通典卷四十六

欽定四庫全書薈要卷九千二百六十五

史部

通典卷四十七

唐 京 兆 杜 佑 君 卿 纂

禮七 吉六

天子宗廟

唐

虞

夏

殷

周

漢

後漢

晉

東晉

宋

齊

梁

陳

後魏

北齊

後周

隋

大唐

昔者先王感時代謝思親立廟曰宗廟

廟貌也宗廟者先祖之尊貌也

因新物而薦享以申孝敬遠祖非一不可徧追故親盡

而止唐虞立五廟

鄭玄按禮緯元命包云天子五廟二昭二穆與始祖而五

其祭尚

氣先迎牲殺於庭取血告於室以降神然後奏樂尸入

王裸以鬱鬯

血腥燭祭用氣者也尚謂先薦之

夏氏因之

夏太祖無功而不立自禹

與二昭二穆也○殷制七廟

商書云七世之廟可以觀德王制云天子七廟鄭玄復云殷制太廟

自契及湯二昭二穆

○周制小宗伯掌建國之神位左宗廟

庫門內雉

門外王立七廟一壇一墠曰考廟曰王考廟曰皇考廟

曰顯考廟曰祖考廟皆月祭之遠廟爲祧有二祧享嘗

乃止去祧爲壇去壇爲墠壇墠有禱焉祭之無禱乃止

去墀曰鬼

以尊本之意王皇皆君也祖始也名先人以君明始者所

封土曰壇除地曰墀天子遷廟之主以昭穆合藏於二祧之中

○鄭玄云周制七廟太

祖及文王武王之祧與親廟四并而七

太祖后稷

王肅云尊

者尊統於上故天子七廟其有殊功異德非太祖而不

毀不在七廟之數其禮與太祖同則文武之廟是

按玄注王

制據禮緯元命包云唐虞五廟殷六廟周七廟又注祭法云天子遷廟之主以昭穆合藏於二祧之中王肅非之曰周之文武受命之主不遷之廟殷之三宗宗其德而存其廟並不以爲常數也凡七廟者不稱周室下及文武而曰天子諸侯是同天子諸侯之名制也孫卿子曰有天下者事七廟有一國者事五代所以積厚者流

澤廣積薄者流澤狹也祭法云遠廟曰祧親盡之上猶存二廟也文武百代不遷者祭法不得云去祧爲壇又曰遷主所藏曰祧先公遷主藏后稷之廟先王遷主藏文武之廟是爲二祧而祭法云有二祧焉祭法親廟四與太祖皆月祭之二祧享嘗乃止是后稷月祭文武則享嘗非禮意也祭法又曰王下祭殤五嫡子嫡孫此爲下祭五代來孫則無親之孫也而上祭何不及無親之祖乎馬昭非王曰喪服小記王者立四廟王制曰天子七廟是則立廟之正以爲親限不過四也親盡爲限不過四也親盡之外有大功德可祖宗者也有其人則七無其人則少故夏氏無太祖則五殷人祖契而宗湯則六周尊后稷文武則七禮器周旅酬六尸發爵周則七廟矣肅言文武不得稱遠廟不得爲二祧者凡別遠近以親爲限親內爲近親外爲遠文武適在親外當毀故言遠廟自非文武親外無不毀者孔晁曰夫無功德則以親遠近爲名文武以尊重爲祖宗廟何取遠近故后

稷雖極遠以爲太祖不爲遠也試評曰禮有以多爲貴王制云天子七

廟諸侯五廟祭法云遠廟爲祧有二祧焉享嘗乃止而鄭玄以文武之廟曰祧不亦疎乎若以天子之祖功德則不立二祧二祧不廟數與諸侯同何以爲隆殺哉虞喜云七廟不始於周伊尹已言七代之廟矣成王六年制禮七廟亦已有見數文王爲祖武王爲禰祖非遠廟也周官掌宗廟而職曰守祧周公不稱祖禰爲遠祧也當須逆數成然後廟得別出不可於成王之代以文武

逆云爲遷主所藏矣○漢高帝令諸侯都皆立上皇廟

高帝崩孝惠即位令奉常叔孫通定宗廟儀法帝東朝

太后長樂宮及間往數音朔蹕煩人作複道武庫南通奏

曰陛下何自築複道高帝寢衣冠月出遊高廟謂從高帝陵寢

出衣冠遊於高廟每一月爲之其道正值今之所作複道子孫奈何乘宗廟道上行

哉帝懼曰急壞之通曰人主無過舉舉事不當有過失也今已作

百姓皆知之矣願陛下爲原廟原重也先有廟今更立之故云重也渭北

衣冠出遊之益廣宗廟大孝之本帝乃立原廟又尊帝

廟爲太祖廟景帝尊孝文廟爲太宗廟所常幸郡國各立太祖太宗廟至宣帝太始二年復尊孝武廟爲世宗廟凡所巡狩亦立焉凡祖宗仕郡國者六十八合百六十七所而京師自高祖下至宣帝與太上皇悼皇考各

自居陵旁立廟

悼皇考宣帝之父即史皇孫也

并爲百七十六又園中

各有寢便殿

凡言便殿室者皆非正大之處也寢者陵上正殿若平生路寢矣便殿者寢側之別

殿日祭於寢月祭於廟時祭於便殿寢日四上食廟歲

二十五祠

漢儀宗廟一歲十三祠如閏便殿歲四祠又加一祠與此共二十五祠也

月一游衣冠而昭靈后武哀王昭哀后孝文太后孝昭

太后衛思后戾太子戾后各寢與諸帝合三十一所一

歲祠上食二萬四千四百五十五用衛士四萬五千一

百二十九人祝宰樂人一萬二千一百四十七人養牲

卒不元帝罷昭靈后武哀王昭哀后衛思后戾太子戾

后園皆不奉祠裁置吏卒守焉罷郡國廟時丞相韋玄成等曰臣聞

唯聖人爲能饗帝孝子爲能饗親立廟京師之居躬親

承事春秋之義父不祭於支庶之宅君不祭於臣僕之

家臣等以爲宗廟在郡國宜勿復修奏可以高皇帝爲太祖孝文皇帝爲太

宗孝景皇帝爲昭孝武皇帝爲穆孝昭皇帝與孝宣帝

俱爲昭皇考廟親未盡太上孝惠廟皆親盡宜毀太上

廟主宜瘞園孝惠帝爲穆主遷於太廟寢園皆罷修成

等又奏議曰禮王者始受命諸侯始封之君皆爲太祖繼太祖以下五廟而迭毀毀廟之主藏乎太祖五年而再殷祭言一禘一祫也祫祭者毀廟與未毀廟之主皆合食於太祖父爲昭子爲穆孫復爲昭古之正禮也祭法曰王者禘其祖所自出以其祖配之而立四廟立親廟四親親也親盡而迭毀親疎之殺示有終也禮廟在大門內不敢遠親也臣愚以爲高皇帝受命定天下宜爲帝者太祖之廟代代不毀承後屬盡者宜毀今宗廟異處昭穆不序宜入就太祖廟而序昭穆如禮太上皇孝惠孝文孝景廟皆親盡宜毀皇考廟親未盡如故悼皇考於元帝爲祖也大司馬許嘉等以爲孝文皇帝除誹謗去肉刑躬節儉宜爲太宗之廟諫議大夫更始等

以爲皇考廟上序於昭穆非正禮宜毀帝乃下詔曰高皇帝爲漢太祖孝文皇帝爲太宗代代承祀傳之無窮孝宣皇帝爲孝昭皇帝後於義一體一體者俱爲昭也禮孫與祖俱爲昭孝宣於昭爲從孫故云一體也孝景皇帝廟及皇考廟皆親盡其正禮儀立成等又奏以高皇爲太祖文爲太宗等詔從之王莽制九廟一曰黃帝太初祖廟二曰帝虞始祖昭廟三曰陳胡王統祖穆廟四曰齊敬王代祖昭廟五曰濟北愍王王祖穆廟六曰濟南伯王尊祖昭廟七曰元城孺王尊祖穆廟八曰陽平頃王昭廟九曰新都顯王穆廟殿皆重屋太祖廟東西南北各四十丈高十七丈餘廟半之爲銅薄櫨飾以金銀琱文窮極百工之巧工費數百鉅萬卒徒死者萬數

○後漢光武皇帝建武二年立高廟於雒陽高帝爲太祖文帝爲太宗武帝爲世宗如舊三年正月立親廟

雒陽祀父南頓君以上至舂陵節侯

節侯名買買生鬱林太守外外生鉅

鹿都尉回回生南頓令欽欽即光武父

時寇賊未平祀儀未設至十九年

議立平哀成元帝廟代今親廟兄弟以下使有司祠宜

爲南頓君立皇考廟祭上至舂陵節侯羣臣奉祠

時五官中

郎將張純太僕朱浮等奏議禮爲人之子事太宗降其私親今親廟四孝宣皇帝以孫後祖爲父立廟於奉明曰皇考廟獨羣臣侍祠願下有司議先帝四廟當代親廟者及皇考廟事下公卿議時從大司徒戴涉奏

曰以宗廟處所未定且祫祭高廟其成哀平且祠祭長

安故高廟其南陽舂陵歲時各且因故園廟祭祀園廟

去太守理所遠者在所令長行太守事侍祠

宗廟在章陵南陽太

守稱使者往祭不使侯王祭者諸侯不得祖天子凡臨祭宗廟皆爲侍祠

惟孝宣帝有功德

其上尊號曰中宗於是雒陽高廟四時加祭孝宣孝元

凡五帝其西廟成哀平三帝主四時祭於故高廟東廟

京兆尹侍祠冠衣車服如太常祠陵廟之禮皇考南頓

君以上至曾祖祭皆就園廟

張純又云禮三年一祫五年一禘毀廟之主陳於太

祖未毀廟之主皆升合食於太祖父爲昭南向子爲穆北向父子不並坐而孫從王父後以三年冬祫五年夏禘之時但就陳祭毀廟之主而已謂之殷太祖東面惠文武元帝爲昭景宣帝爲穆惠景昭三帝非殷祭時不

祭按周制三年一禘五年一祫至此則革周制明帝以光武撥亂中興更爲起

廟上尊號曰世祖廟

蔡邕曰孝明帝立世祖廟以明再受命祖有功之義後嗣遵儉不復

改立皆藏主其中聖明所制一王之法也自執事之吏下至學士莫知所以兩廟之意

以元帝於

光武爲穆故雖非宗不毀也後遂爲常明帝遺詔遵儉無起寢廟藏主於世祖廟更衣孝章初不敢違以更衣有小別上尊號曰顯宗廟間祠於更衣四時合祭於世祖廟章帝遺詔無起寢廟如先帝故事和帝初不敢違上尊號曰肅宗後帝承遵皆藏主于世祖廟積多無別

是後顯宗但爲陵寢之號靈帝時京都四時所祭高廟

五主世祖廟七主少帝三陵

瑒冲質三少帝

追尊后三陵

安帝追尊

祖妣宋貴人曰敬隱皇后皇妣左氏曰孝德皇后順帝追尊皇妣李氏恭愍皇后

凡牲用十八

太牢皆有副俸故高廟三主親毀之後亦但殷祭之歲

奉祠

毀廟之主藏於世祖之廟一世爲祧祧猶四時祭之二世爲壇三世爲墀四世爲鬼祫乃祭之有禱

亦祭之祫於始祖之廟禱則迎主出陳於壇墀而祭之事訖還藏故室迎送皆蹕

獻帝初平中

董卓與蔡邕等以和帝以下功德無殊而有過差不應

爲宗及餘非宗者追尊三后皆奏毀之

蔡邕論曰漢承亡秦滅學之後

宗廟之制不用周禮每帝即世輒立一廟不止於七不
列昭穆不定迭毀孝元帝時丞相匡衡御史大夫貢禹
始建大議請依典禮孝文孝武孝宣皆以功德茂盛爲
宗不毀孝宣尊崇孝武廟稱世宗中正大臣夏侯勝等
猶執異議不應爲宗至孝成帝議猶不定太僕王舜中
壘校尉劉歆據經傳義處不可毀上從其議古人據正
重順不敢私其君父若此其至也後遭王莽之亂光武
受命中興廟稱世祖孝明帝聖德聰明政叅文宣廟稱
顯宗孝章帝至孝烝烝仁恩博大廟稱肅宗比方前代
得禮之宜自此以下政事多疊權移臣下嗣帝殷勤各
欲褒崇至親而臣下懦弱莫敢執夏侯侯之直今聖朝遵
古復禮以求厥中誠合事宜元帝世在第八光武世在
第九故以元帝爲考廟尊而奉之孝明遵述亦不敢毀
孝和以下穆宗威宗之號皆宜省去五年而再殷祭恰
食于太祖以遵
先典議遂施行

四時所祭高廟一祖二宗及近帝四凡

七帝○魏文帝受禪追尊大父曰大皇帝

諱嵩後漢太尉大長秋曹

騰養子也

考曰武皇帝以洛京宗廟未成乃祠武帝於建始

殿親執饋奠如家人禮

按禮將營宮室宗廟爲先庶人無廟則祭於寢帝者行之非禮

甚矣明帝太和三年又追尊高祖大長秋曰高皇夫人吳

氏曰高皇后並在鄴廟之所祠則文帝之高祖處士

沛國

譙人曾祖高皇

萌之子騰

祖大皇帝共一廟考太祖武皇帝

特一廟百代不毀然則所祠止於親廟四室也其年十

一月洛京廟成則以親盡遷處士主置園邑使宗正曹

恪持節迎高祖以下神主共一廟猶爲四室而已景初
元年六月羣公更奏定七廟之制曰武皇帝肇建洪基
爲魏太祖文帝繼天革命爲魏高祖上集成大命宜爲
魏烈祖於太祖廟北爲二祧其左爲文帝廟號曰高祖
昭祧其右擬明帝號曰烈祖穆祧其明帝時見在造廟
及稱祖當時之制非
前代舊三祖之廟萬世不毀其餘四廟親盡迭遷一如
規也

周后稷文武廟祧之禮

吳孫權不立七廟以父堅嘗爲
長沙太守乃於臨湘縣立堅廟

依後漢奉南頓故事令太守奉嗣後又尊堅廟曰始祖
廟而不在京師又以吳芮家材爲屋未之聞也於建業

立兄長沙桓王策廟朱雀橋南權疾令太子禱焉子亮
立明年於宮東立權廟曰太祖廟既不在宮南又無昭
穆之序獨劉備稱帝號於成都立宗廟備雖代紹而起
亦未辨繼何帝爲稱亦無祖宗之號又劉禪面縛降魏
哭於昭烈之廟則備廟別立也○晉武帝即位追尊皇祖宣王爲宣皇

帝伯考景王爲景皇帝考文王爲文皇帝權立一廟初

司奏置七廟帝重其勞役權立一廟後用魏廟追祭征西將軍名鈞字章

郡府君鈞之子名景章郡太守字公度潁川府君景之子名

雋潁川太守京北府君雋之子名防京北尹字建公生宣帝與宣帝景帝文

帝爲三昭三穆羣臣奏曰上古清廟一宮尊遠神祇逮至周室制爲七廟以辨宗祧聖旨深弘

遠跡上世捨七代之繁華尊一宮之遠旨昔舜承堯禪受終文祖遂陟帝位蓋三十載月正元日又格於文祖此則虞氏不改唐廟可依是時宣皇未升太祖虛位所虞氏故事即用魏廟奏可

以嗣六代與景帝爲七廟

其禮據王肅說

廟制於中門外之左

通爲屋四阿殿制堂高三尺隨見廟數爲室代滿備遷

毀

太常博士孫毓議云考工記左祖右社孔子曰周人敬鬼神而遠之近人而忠焉禮諸侯三門立廟宜在

中門外之左宗廟之制外爲都宮內各有寢廟別有門垣太祖在北左昭右穆次而南今宜爲殿皆如古典

太康元年靈壽公主修麗祔於太廟

按周漢未有其准至魏明帝則別立

平原主廟晉又異魏也

六年廟陷當改修創羣臣議奏曰古者七

廟異所自宜如禮又曰古雖七廟自近代以來皆廟七室於禮無廢於情爲叙亦隨時之宜也○東晉元帝上

繼武帝於禮爲禰

如漢光武上繼元帝故事

時西京神主陷於虜庭

江左建廟皆更新造尋登懷帝之主又遷潁川府君

位雖

七室其實五代蓋從刁協議以兄弟爲代數故也

於時三祖毀主權居別室太

興三年將祭愍帝之主乃更定制還復章郡潁川於昭

穆之位

以同惠帝嗣武故事而惠懷愍三帝自從春秋尊卑之義在廟不替也

元帝崩則

章郡復遷

元帝神位猶在愍帝之下故有坎室者十也

至明帝崩而潁川又

遷猶十室也於時續廣太廟故三遷主並還西儲名之
曰祧以準遠廟成帝咸康五年始作武悼皇后神主祔
廟配饗世祖成帝崩而康帝承統以兄弟一代故不遷
京兆始十一室也康帝崩穆帝立京兆遷入西儲同謂
之祧如前三祖遷主之禮故正室猶十一也穆帝崩而
哀帝海西並爲兄弟無所登除咸安之初簡文皇帝上
繼元皇帝於是潁川京兆二主復還昭穆之位簡文崩
潁川又遷孝武帝太元十二年始改作太廟殿正室十

四間東西儲各一間合十六間棟高八丈四尺備法駕
遷神主於行廟征西至京兆四主及太孫各用其位之
儀服四主不從帝者儀是與太康異也及孝武崩京兆
又遷如穆帝之世四祧故事○宋武帝即尊位祠七代
爲七廟永初追尊皇考晉陵郡功曹翹即武帝父晉陵本郡爲孝皇帝皇
妣趙氏爲穆皇后三年孝懿蕭皇后崩又祔廟高祖崩
神主升廟猶昭穆之序如魏晉之制虛太祖之位文帝
元嘉初追尊所生胡婕妤爲章皇太后立廟於太廟西

其後孝武昭太后明帝宣太后並祔章太后廟○齊高

帝追尊父爲宣皇帝

右軍將軍承之

母爲昭皇后七廟

蕭子顯曰晉用

王肅之議以文景爲共代上至征西其實六也尋此意非以兄弟爲後當以立主之義可容於七室及楊元后崩征西之廟不毀則知不以元后爲代數廟有七室數盈八主晉太常賀尋立議以後弟不繼兄故代必限七主無定數宋臺初立五廟以藏后爲代室就禮而求亦親廟四矣若據伊尹之言必及七代則子昭孫穆不列婦人若依鄭玄之說廟有親稱妻者言齊豈或濫享且閔宮之德用七非數楊元之祀晉八無傷今謂之七廟而止唯六祀使受命之君流光之典不足若謂太廟齊登則昭穆之數何繼斯故禮官所宜詳也○梁

武帝受禪遷神主於太廟爲三昭三穆凡六廟追尊皇

考爲文皇帝

丹陽尹順之

皇妣爲德皇后廟號太祖皇祖以

上皆不追尊擬祖遷於上而太祖之廟不毀與親廟爲
七皆同一堂共庭而別室○陳依梁制七廟如禮初文
帝入嗣而皇考始興昭烈王廟在始興國謂之東廟天
嘉中徙神主祔於梁之小廟改曰國廟祭用天子儀○
後魏之先居於漠北鑿石爲祖宗之廟於烏洛侯國西
北明元帝永興四年立太祖道武帝廟於白登山歲一
祭具太牢帝親奉無常月又於白登西太祖舊遊之處

立昭成獻明太祖廟常以九月十月之交帝親祭牲用馬牛羊又親行軀劉之禮孝文太和三年六月親謁七

廟

時羣官議曰大魏舊事多不親謁今陛下孝誠發中思親執祀謹按舊章集爲親拜之儀制可

十五

年四月改營太廟詔曰祖有功宗有德後者不得擅祖宗之名居二祧之廟今述遵先志宜制祖宗之號烈祖有創業之功代祖有開拓之德宜爲祖宗百代不遷而遠祖平文功未多於昭成然廟號爲太祖道武建業之勲高於平文廟號爲烈祖比校似爲未允朕今奉尊道

武爲太祖顯祖爲二祧餘皆以次而遷平文既遷廟唯
有六如今七廟一則無主唯當朕躬此事亦臣子所難
言朕以不德忝承洪緒若宗廟之靈獲全首領以沒於
地爲昭穆之次心願畢矣必不可先設可垂文示後司空

長樂王穆亮等奏言升平之會事在於今推功考德實
如明旨但七廟之祀備行日久無宜闕一虛有所待臣
等愚謂依先尊祀可垂文示後俚衷如此不敢不言
八月詔郡國有時果可薦者

並送京師以供廟享其白登山鷄鳴山廟唯遣有司行
事十一月釋禪祭太和廟帝袞冕與祭者朝服丁卯遷

廟之神主於太廟百官倍從奉神主於齋車至新廟有司升神主於太廟諸侯王牧守蕃附等各以其職來祭十月詔先王制禮經綸萬代白登廟者有爲而興昭穆不次太祖有三層之宇已降無方丈之室又常用季秋躬駕虔祀今授衣之月享祭明堂立冬之始奉烝太廟若復齋白登便爲一月再駕緬詳二理謂宜省一可廢東山之祀成此二享之敬可勅有司但命內典神者攝行祭事獻明道武各有廟稱可具依舊式自太宗諸帝

昔無殿宇因停之十九年遷都洛邑二月詔曰太和廟
已就神儀靈主宜時奉寧可尅五月奉遷於廟其出金
墉之儀一准出代都太和之式入新廟之典可依近至
金墉之軌其威儀鹵簿如出代廟百官奉遷宜可省之
但令朝官四品以上侍官五品以上宗室奉迎○北齊
文宣帝受禪置六廟獻武以下不毀以上則遞毀並同
廟而別室既而遷神主於太廟文襄文宣並太祖之子
文宣初疑其昭穆之次欲別立廟衆議不同至二年秋

始附太廟五祭同梁制○後周閔帝受禪而右宗廟追

尊皇祖爲德皇帝

名肱生泰

父文王爲文皇帝廟號太祖

太師

周國公名泰

擬祖以上三廟遞遷至太祖不毀其下相承置

二穆爲五馬明帝崩廟號代宗武帝崩廟號高祖並爲

祧廟不毀○隋文帝受命遣兼太保宇文善奉策詣同

州告皇考桓王廟兼用女巫同家人禮追尊號爲武元

皇帝

大司空名忠

皇妣爲元明皇后迎神歸於京師改立左

宗廟未言始祖又無受命之祧自高祖以下置四親廟

同殿異室一皇高祖太原府君廟二皇曾祖康王廟三

皇祖獻王廟四皇考太祖武元皇帝廟擬祖遷於上而

太祖之廟不毀至煬帝立七廟太祖各一殿准周文武

二祧與始祖而三餘並分室而祭始及祧之外從迭毀

之法

時禮部侍郎許善心等議案周制自太祖以下各別立廟至於禘祫皆食於太祖是以前漢亦隨處

而立後漢光武新平寇亂務從省約乃總立一堂而羣主異室自此以來因循不變今請立七廟詔可既

營洛邑後有司奏請於東京建立宗廟帝謂秘書監柳

詡曰今始祖及二祧已具令後子孫處何所又下詔准

議別立高祖之廟屬有行役復寢○大唐武德元年追尊高祖曰宣簡公曾祖曰懿王祖曰景皇帝考曰元皇帝法駕迎神主祔於太廟始享四室貞觀九年高祖崩增修太廟中書侍郎岑文本議曰祖鄭玄者則陳四廟之制述王肅者則引七廟之文貴賤混而莫辨是非紛而不定春秋穀梁傳及禮記王制祭法禮器孔子家語並云天子七廟諸侯五廟大夫三廟士一廟尚書咸有一德曰七世之廟可以觀德至於孫卿孔安國劉歆班

彪父子孔晁虞喜于寶之徒商較今古咸以爲然故其
文曰天子三昭三穆與太祖之廟而七是以晉宋齊梁
皆依斯義立親廟六豈有國之茂典不刊之休烈乎然
若使違羣經之正說從累代之疑議背子雍之篤論遵
康成之舊學則天子之禮下逼於人臣諸侯之制上僭
於王者非所謂尊卑有序名位不同者也臣等參詳請
依晉宋故事立親廟六其祖宗之制式遵舊典制從之
於是增修太廟始崇弘農府君及高祖神主并舊四室

爲六室太宗崩遷弘農府君神主於夾室太宗神主祔
太廟高宗崩神主祔太廟又遷宣皇帝神主於夾室睿
宗垂拱四年正月又於東都立高祖太宗高宗三廟四
時享祀如京廟之儀別立崇先廟以享武氏祖考武太
后又令議崇先廟室數所司議遂止

博士周棕請立七廟其皇家太廟請

減爲五室春官侍郎賈太隱奏曰秦漢太后臨朝稱制並據禮經正文天子七廟諸侯五廟今周棕別引浮議廣述異文直崇權議不依常度其崇先廟今同諸侯之數國家宗廟不可移變太后遂止既革命稱

帝改大唐京太廟爲享德廟四時唯享高祖以下三室

餘四室閉其門廢享祀之禮又於東都改制太廟爲七
室祔武氏七代神主及改京崇先廟爲崇尊廟其享祀
如太廟之儀仍改太廟署爲清廟臺加官員崇其班秩
神龍元年改享德廟依舊爲京太廟遷武氏七廟神主
於西京崇尊廟東都置太廟以景皇帝爲太祖廟崇六
室時太常博士張齊賢建議曰始封之君謂之太祖太
祖之廟百代不遷商之元王周之后稷是也但商自元
王以後十有四代至湯而有天下周自后稷以後十有

七代至武王而有天下其間代數既遠遷廟親皆出太祖之後故得合食有序尊卑不差其後漢高受命無始封祖即以高祖皇帝爲太祖魏武創業文帝受命亦以武帝爲太祖晉宣創業武帝受命亦以宣帝爲太祖宇文以文皇帝爲太祖隋室以武元皇帝爲太祖國家景皇帝始封唐公實爲太祖中間代數既近列在三昭三穆之內故皇家太廟唯有六室其弘農府君宣光二帝尊於太祖親盡則遷不在昭穆合食之數奉勅七室以

下依舊號尊崇續又奉勅既立七廟須尊崇始祖速令
詳定者伏尋禮經始祖即太祖太祖之外更無始祖後
周太祖之外以周文王爲始祖不合禮經或有引白虎
通義云后稷爲始祖文王爲太祖武王爲太宗及鄭玄
注詩序云太祖謂文王以爲說者其義不然何者彼以
禮王者祖有功而宗有德周人祖文王而宗武王以謂
文王爲太祖耳非祫祭羣主合食之太祖今議者或有
欲立涼武昭王爲始祖者殊爲不可何者昔在商周稷

禹始封湯武之興祚由稷禹故以爲太祖即皇家之景
帝是也涼武昭王勲業未廣後主失守國土不傳景皇
始封實本明命令乃捨封唐之盛烈崇西涼之遠構求
之前古實乖典禮魏氏不以曹參爲太祖晉氏不以殷
王卬爲太祖宋氏不以楚元王爲太祖齊梁不以蕭何
爲太祖陳隋不以胡公楊震爲太祖則皇家安可以涼
武昭王爲太祖乎漢之東京大議郊祀多以周郊后稷
漢當郊堯唯杜林議獨以爲周室之興祚由后稷漢業

特起功不緣堯祖宗故事所宜因循竟從林議又傳稱
欲知天上事問長人以其近之武德貞觀之時去涼武
昭王蓋亦近於今矣當時不立者不可立故也今既年
代寢遠方復立之實恐景皇失職而震怒武昭虛位而
不荅非社稷之福也請准勅加太廟爲七室享宣皇帝
以備七代其始祖不合別有尊崇太常博士劉承慶議
曰夫太祖以功建昭穆以親崇有功百代而不遷親盡
七葉而當毀或以太祖代淺廟數非備更於昭穆之上

遠立合遷之君曲從七廟之文深乖迭毀之制景皇帝
濬德基唐代數猶近號雖崇於太祖親上列於昭穆且
臨六室之位未申七代之尊是知太廟當六未合有七
故先朝唯有宣光景元神堯文武六代親廟大帝登遐
神主升祔於廟室以宣皇帝代數當滿准禮復遷今止
有光皇帝以下六代親廟非是天子之廟數不當有七
本由太祖有遠近之異故初建有多少之殊宣皇既非
始祖又廟無祖宗之號親盡既遷其廟不合重立恐違

王制之文不合先朝之旨光宗六室不虧古義時有制
令宰臣更加詳定禮部尚書祝欽明等奏言張齊賢以
始同太祖不合更祖昭王劉承慶以王制三昭三穆不
合重宗宣帝臣等商量請依張齊賢以景皇帝爲太祖
依劉承慶尊崇六室制從之三年改武氏崇尊廟爲崇

恩廟依天授時享祭其廟齋郎將用五品子後却止

時武

三思用事密令安樂公主諷中宗故有此制尋又令崇
恩廟齋郎取五品子充太常博士楊浮奏曰太廟齋郎
唯取七品子今崇恩廟既取五品子太廟齋郎作何等
級帝曰亦准崇恩浮曰崇恩爲太廟之臣以臣准君猶

爲僭逆以君准臣
天下疑懼乃止

睿宗廢崇恩廟開元四年改題則天

神主云則天皇后武氏

太常卿姜皎復與禮官上言曰
今太廟中則天皇后配高宗題

云天后聖帝武氏神龍之初已去帝號岑羲不閑正禮
復題帝名恐非通典請宜題云則天皇后武氏從之

十年制移中宗神主就正廟仍創立九室其後制獻祖

懿祖太祖代祖高祖太宗高宗中宗睿宗太廟九室也

中宗睿宗兄弟相繼孫平子
上書論之具兄弟昭穆篇中

二十三年正月赦文宗廟

致享務在豐潔禮經沿革必本人情籩豆之薦或未能
備物宜令禮官學士詳議具奏太常卿韋縚奏宗廟之

奠每座籩豆各加十二又酒爵制度全小僅無一合執持甚難請稍令廣大付尚書省集衆官詳議太子賓客崔沔議曰竊聞識禮樂之情者能作知禮樂之文者能述述作之義聖賢所重禮樂之本古今所崇變而通之所以久也所謂變者變其文也所謂通者通其情也祭禮之興肇於太古人所飲食必先嚴獻未有火化茹毛飲血則有毛血之薦未有麴蘖污樽抔飲則有玄酒之奠施及後王禮物漸備作爲酒醴嚴其犧牲以致馨香

以極豐潔故有三牲八簋之盛五齊九獻之殷然以神
道至元可存而不能測也祭禮致敬可備而不可廢也
是以毛血腥爛元罇犧象靡不畢登於明薦矣然而薦
貴於新味不尚褻雖則備物猶存節制故禮云天之所
生地之所長苟可薦者莫不咸在備物之情也又曰三
牲之俎八簋之實美物備矣昆蟲之異草木之實陰陽
之物備矣節制之文也鉶俎籩豆簠簋 罍實皆周人
之時饌也其用通於讌饗賓客而周公制禮咸與毛血

玄酒同薦於先晉中郎盧湛近古知禮者也著家廟祭禮皆晉時常食不復純用舊文然則當時飲食不可闕於祀祭明矣是變禮文而通其情也我國家由禮立訓因時制範考圖史於前典稽周漢之舊儀清廟時享禮饌畢陳用周制也而古式存焉園寢上食時膳具設遵漢法也而珍味極焉職貢來祭致遠物也有新必薦順時令也苑囿之內躬穡所收蒐狩之時親發所中莫不割鮮擇美薦而後食盡誠敬也若此至矣復何加焉但

當申勅祭如神在毋或簡怠增勗虔誠其進珍羞或時
鮮美考諸祠典有所漏畧皆詳擇名目編諸甲令因宜
而薦以類相從則新鮮肥醲盡在是矣不必加於籩豆
之數也至於祭器隨物所宜故太羹古食也盛於甑
古器也和羹時饌也盛於鉶鉶時器也亦有古饌而盛
於時器故毛血盛於盤玄酒盛於罇未有薦時饌而追
用古器者古質而今文便於事也雖加籩豆十二未足
以盡天下美物而措諸清廟有兼倍之名近於侈矣又

據漢書藝文志墨家之流出於清廟是以貴儉由此觀之清廟之不尚於奢舊矣太常所請恐未可行又稱酒爵全小須加廣大竊據禮文有以小爲貴者獻以爵貴其小也小不及制敬而非禮是有司之失其傳也固可隨失釐正無待議而後革未知今制何所依准請兼詳令式據文而行上曰享祀實思豐潔不應法制者亦不可用於是更令太常量加品味韋縚又請每室加籩豆各六每四時異品以當時新果及珍羞同薦制可之又

酌獻酒爵止令用藥汁一升合於古義而多少適中自是常依行焉天寶三載詔頃四時有事於太廟兩京同日告享雖卜吉辰俱遵上日而義深如在禮或有乖自今以後兩京宜各別擇吉日告享五載詔祭神如在傳諸古訓以多爲貴著自禮經脽膋之儀蓋昔賢之尚質甘旨之品亦孝子之盡誠既切因心方資慶禮其以後享太廟宜料外每室加常食一牙盤仍令所司務盡豐潔九載七月制曰承前有事宗廟皆稱告享茲乃臨下

之辭頗虧尊上之義靜言斯稱殊未爲允自今以後每親告獻太清太微宮改爲朝獻有司行事爲薦獻親告享廟改爲朝享有司行事爲薦享親巡陵改爲朝拜有司行事爲拜陵應緣諸事告宗廟者並改爲奏其郊天后土及諸祝文云敢昭告者並改爲敢昭薦乾封元年詔曰每惟宗廟至敬虔誠裸享而二等一奠惟有未安思革舊章用崇嚴配自今以後宗廟薦享爵及簋簠鉶各宜別奠其惟牢饌並依恒典貞元九年十一月九日謁太廟有勅至廟行禮不得施褥至敬之所自合履地而行南郊亦宜准此

后妃廟

周

魏

東晉

宋

齊

梁

大唐

周祭先妣之廟

姜嫄履大人跡感神靈而生后稷是周之先母也周立廟自后稷爲始祖而姜

嫄無所配是以特立廟祭之謂之閼宮閼神之

四時薦禘祫與七廟皆祭樂奏

夷則舞大濩

夷則陽聲次五小呂爲之合

○魏文思后依周姜嫄廟

禘祫

高堂隆議

文帝甄后賜死故不列廟明帝即位有司奏

請追諡曰文昭皇后使司空王朗持節奉策告祠於陵

時三公又奏曰自古周人既祖后稷又特立廟以祀姜嫄今文昭皇后於後嗣聖德至化豈有量哉夫以皇家

世妃之尊神靈遷化而無寢廟非以報顯德昭孝敬也宜依周禮別立寢廟

太和元年二月

立廟於鄴四月洛邑初營宗廟掘地得玉璽方一寸九分其文曰天子美思慈親明帝爲之改容以太牢告廟

景初元年十二月有司又奏文昭皇后立廟京師永傳享祀樂舞與祖廟同廢其在鄴廟

○東晉元

帝初爲晉王妃虞氏先亡王導與賀循書論虞廟

元帝爲琅

琊王納虞氏爲妃永嘉中亡帝爲晉王追謚爲后而元帝子明帝自有母時以此疑故比兄弟昭穆之義也

云王所崇惜者體也未敢當正位入廟及毀廢之所不知便可得爾不循答曰漢光武於屬以元帝爲父故於昭穆之叙便居成帝之位而遷成帝之主於長安高廟

今聖上於惠帝爲兄弟亦當居惠帝之位而上繼武帝
惠帝亦宜別廟則虞妃廟位當以此定導又云載若思
欲於太廟立后別室循答曰愚以尊王既當天之正統
而未盡宸居之極稱既名稱未極更於事宜爲難或謂
可立別廟使進退無犯意謂以尊意所重施於今宜如
有可爾理若全尊尋備昭穆既正則俯從定位亦無拘
小別然非常禮無所取准於名則未滿於禮則變常竊
以戴所斟酌於人情爲未安○宋孝武大明二年有司

奏皇代殷祭無事於章太后

博士孫武議祭統曰有事於太廟則羣昭羣穆咸在

不失其倫殷祀是合太祖而序昭穆章太后既居於上不立正廟若迎主入太廟既不敢配列於正序又未聞於昭穆之外別立爲位章太后廟四時享薦雖不於孫止若太廟祫祫獨祭別宮與四時烝嘗不異則非祫大祭之義又無取於祫合食之文
謂不宜與太廟同殷祭之禮也
詔曰章皇太后追尊極

號禮同七廟豈容獨闕殷薦隔茲盛祀闕宮遙祫既行

有周魏晉從饗式範無替宜述附前典以宣情敬

博士王夔

之議按祫小廟禮無正文求之情例如有可准推尋祫之爲名雖在合食而祭典之重此爲大夫以孝享親尊者愛罔極既殷薦於太祖亦致盛祀於小廟譬有事於尊者可以及卑故魏高堂隆所謂猶以祫故而祭之也

是以魏之文思晉之宣后雖不並序於太廟而猶均禘於姜嫄其意如此又徐邈所引四殤不祫就而祭之以爲別饗之例斯其證矣愚謂七年詔立宣貴妃廟時有章太后廟亦宜殷薦從之奏

故宣貴妃既加殊禮未詳應立廟不虞龢議曰婚義云后立六宮后有妃猶天子之有三公也三公既尊於列國諸侯三妃亦貴於庶邦夫人據春秋仲子其祀得考彼別宮今貴妃理應立此新廟詔可龢音蘇

禮王親執奠爵有故三卿行事

時有司又奏言新安王服宣貴妃齊衰周十二

月練十三月縞十五月禪心喪三年未詳宣貴妃立廟在何時入廟之日當先有祔爲但即入新廟而已若是大祥未及禪中入廟者遇四時便得祭不又新安王在心制中得親奉祭不左丞徐爰議以禮有損益古今異儀春秋傳雖云卒哭而祔祔而作主代之諸侯皆禫終入廟且麻衣繚緣革服於元嘉苦經變除申行諸皇宋

况宣貴妃誕育獻蕃葬加殊禮靈筵廬位皆主之哲聖
考宮創祀不復問之朝廷謂禪除之後宜親執奠爵若
有故三卿行事詔明帝太始二年昭太后崩有司奏太
可縗音七絹反

后於至尊無親上特制義服祔廟之禮下禮官詳議乃

躋新祔于上位其祭使有司行禮

博士王畧等奏昭皇太后正位母儀尊號

允著祔廟之禮宜備彛典則愚謂神主應入章后廟又
宜依晉元皇之於愍帝安帝之於永安后祭祀之日不
親執觴爵使有司行事時太后宣后已祔章太后廟虞
辭議以爲春秋之義庶母雖名同崇號而實異正嫡是
以猶考別宮而公子主其祀今昭皇太后既非所生益
無親奉之理周禮宗伯職云若王不與祭則攝位然則
使有司行其禮又婦人無常秩各以夫爲定夫亡以子
爲次昭皇太后即正位於前宣太后追尊在後以次序

而言宜躋祔
于上位詔可

六月有司奏七月嘗祠二廟依舊車駕親

奉孝武皇帝室至尊親進觴爵及昭皇太后室應拜及

祝文稱皇帝

御名

又皇后今月二十五日虔見於禰拜孝

武皇帝昭皇太后並無明文禮官議曰今上既纂嗣文

皇於孝武進拜而已觴爵使有司行事昭皇太后祝文

稱皇帝

御名

孝武昭皇太后二室廢薦告後廢帝元徽二

年十月丙寅有司奏至尊親祠太廟文皇帝太后廟之

日孝武皇帝及昭皇太后雖親非正統而常經北面宜

執孝武皇帝觴爵昭皇太后依舊三公行事

左丞孫緬議晉代祖

宗孝宗顯宗烈宗肅宗並是晉帝之伯今朝明准初無有司行事之文愚謂主上親執孝武皇帝觴爵有悞情敬皇太后君母之貴見尊一時與章宣二廟同享闕宮非惟不可躬奉乃宜議其毀替請且依舊三公行事從之

○齊明帝建武二年有司奏遷景懿后於新廟

車服之儀

乘重翟車服之褱衣首飾以覆侍中散騎常侍黃門侍郎散騎侍郎各二人分從前後部同於王者內職有女尚書女長

○梁武帝立小廟

太祖太夫人廟也非嫡故別立廟

皇帝每

祭太廟訖乃詣小廟亦以一太牢如太廟禮○大唐立

肅明皇后廟時享有司行事如開元禮

皇太子及皇子宗廟

東晉

大唐

東晉孝武帝太元六年詔曰亡大兄以司馬珣之爲國

後祭祀何儀博士江熙議穀梁傳云公子之重視大夫

則王子一例也請皇子廟祭用大夫禮三廟

博士沈寂等議禮大

夫三廟無貴賤之別然則上至皇子下及陪臣其禮無二

牲用少牢若繼嗣之身未

准大夫祭用士禮

按會稽王嗣子即簡文帝長子博士沈寂等議會稽王嗣子既以疾廢當

降從之公子則皆如大夫牲用少牢

宜權立行廟告嗣而後迎繼嗣之身

江熙議皇子雖有廟然無子不立廟故詔使立後祫嘗之祀稱皇帝有命命某繼嗣博士沈寂議皇子依如大

夫禮應立後宜先告權爲行廟告於禮無文宜先行廟告嗣而後迎繼嗣之身案禮君薨嗣子生太祝裨冕告於廟既葬嗣子生祝告於廟明夫宗廟者神靈之所宅是以存亡吉凶必先告於廟古今不革之制三代不易之典豈有興滅繼絕傳祀百代而誣亡者之靈滅告生之義耶緣情依禮謂宜先告於靈後迎繼嗣之身庾蔚之謂嗣子以無子不廟合有嗣乃立廟○大唐開元三耶告生者是先自有廟不得引以爲例

年右拾遺陳貞節以諸太子廟不合守供祀享上疏伏見章懷太子等四廟遠則從祖近則堂昆並非有功於人立事於代而寢廟相屬獻裸連時事不師古以克永代臣實疑之今章懷太子等乃以陵廟分署官寮八處

修營四時祭享物須官給人必公糧合樂登歌咸同列
帝謹按周禮始祖以下猶稱小廟未知此廟厥名維何
臣謂八署司存員寮且省四時祭祀供給咸傳臣又聞
磐石維城既開封建之典別子爲祖非無大小之宗其
四陵廟等應須祭祀者並令承後子孫自修其事崇此
正典冀合禮經上令有司集禮官及羣臣詳議奏聞駕
部員外郎裴子餘議曰謹按前件四廟等並前皇嫡允
殞身昭代聖上哀骨肉之深錫烝嘗之享憲章往昔垂

範將來昔嫫廟列周戾園居漢並位非七代置在一時
斯並前代宏規後賢令範又按春秋狐突適下國遇太
子使登僕曰予將以晉畀秦秦將祀予此則太子之言
無後明矣對曰神不歆非類人不祀非族君祀無乃殄
乎此則晉有其祀立廟必矣又定公元年立煬宮經傳
更無異說鄭玄注云煬公伯禽之子季氏禱而立其宮
也考之漢儲晉嫡則如彼言乎周廟魯宮則如此豈可
使晉求秦祀戾匪漢恩求枉者深所直者鮮黷神慢禮


理必不然且尊以儲后位絕諸侯謚號既崇官更有典
去羊存朔非理所安徇利忘禮何以爲國太常博士段
同泰議曰伏據隱太子等皆稟殊恩式創陵寢一著蘋
藻驟移檀栢豈非睦親繼絕悼往推恩者歟况漢置戾
園晉循虞祀書稱咸秩禮紀百神紛綸歲祀可畧言矣
隱太子等並特降絲綸別營祠宇義殊太廟恩出當時
借如逝者之錫蘋蘩亦猶生者之開茆土寵章所及誰
謂非宜且自古帝王封建子孫寄以維城之固歲登別

郡之榮豈必有功於人立事於代生者曾無異議逝者
輒此奏停雖存沒之跡不同而君親之恩何別此則輕
重非當情禮不均神道固是難誣人情孰云其可開元
二十二年七月勅贈太子頃年官爲立廟并致享祀雖
欲歸厚而情且未安烝嘗之時子孫不及若專令官祭
是以疎間親遂此爲常豈云教孝其諸贈太子有後者
但官置廟各令子孫自主祭其署及官悉停若無後者
宜依舊上元二年二月禮儀使太常卿杜鴻漸奏讓帝

七廟等請停四時享獻每至禘祫之月則一祭焉樂用
登歌一部牲獻罇俎之禮同太廟一室之儀



通典卷四十七



總校官庶吉士 臣侍 朝

校對官編修 臣莫瞻菴

謄錄監生 臣毛大瀛